



Communicaziun a las medias

Berna 21 da favrer 2022

Ina valisch plain ideas rumantschas en la Chasa federala

Il 21 da favrer 2022 cumenza l'emna internaziunala da la lingua rumantscha («Emna rumantscha»). Questa iniziativa è vegnida lantschada l'onn passà dal DFAE en collavuraziun cun il chantun Grischun e cun la Lia Rumantscha. Er quest onn è la giuventetgna en il center: Per inaugurar la segunda «Emna rumantscha» ensemen cun il cusseglier guvernativ dal Grischun Jon Domenic Parolini, ha il president da la Confederaziun Ignazio Cassis envidà ina gruppa da scolaras e scolars dal stgalim secundar da Savognin e da Scuol a Berna. La delegaziun da scolaras e scolars è arrivada cun ina valisch plain ideas per promover la lingua e la cultura rumantscha en Svizra e per la render enconuschenta er a l'exteriur.

«Rumantsch: in ferm toc Svizra». Ma er in ferm toc mund. Quai è il motto da la «Emna rumantscha» ch'il Departament federal d'affars exteriurs (DFAE) organisescha en collavuraziun cun il chantun Grischun. «La diversidad è ina ritgezza per noss pajais. Questa occurrenza annuala ans permetta da promover nossa identidad multifara – en Svizra grazia a la contribuziun da la giuventetgna rumantscha ed a l'exteriur tras nossas represchentanzas», ha declerà il president da la Confederaziun Ignazio Cassis. Las represchentanzas svizras a l'exteriur organiseschan er quest onn puspè occurrenzas per render pli enconuschenta la lingua e la cultura rumantscha en lur pajais – pervia da las mesiras en connex cun COVID-19 oravant tut en furma d'eveniments e da cuntegns digitalis.

Ina valisch rumantscha plain diversidad

Suenter la scuntrada cun las scolaras ed ils scolars da Glion ed ils curs da rumantsch cun la Lia rumantscha a Scuol l'onn passà cuntinuescha il cusseglier federal Ignazio Cassis ses viadi d'exploraziun da la quarta lingua naziunala. Quest onn ha el envidà dudesch scolaras e scolars da Savognin e da Scuol che represchantan il surmiran ed il vallader. Ils giuvenils han purtà cun sai ina valisch plain ideas e propostas per promover la lingua e la cultura rumantscha e las han

preschentadas al president da la Confederaziun ed al schef dal Departament d'educaziun, cultura e protecziun da l'ambient dal chantun Grischun. «Coesiun e passiu per la diversitad: Sin questas fermezzas sto la Svizra sa concentrar per superar sias sfidas. Las scolaras ed ils scolars da Savognin e da Scuol mussan che nossa diversitad maina ad ideas innovativas che distinguan la Svizra er a l'exteriur», ha ditg Ignazio Cassis.

Plurilinguitad: la collavuraziun dal DFAE cun ils chantuns Grischun e Tessin

La «Emna rumantscha» fa part d'ina retscha d'occurrenzas che suttastritgan – sco il «Di da la plurilinguitad», la «Settimana della lingua italiana nel mondo» e la «Semaine de la francophonie» – l'impurtanza da la plurilinguitad per la coesiun naziunala, ma er per l'avertura vers l'exteriur.

La promoziun da las linguas minoritaras en Svizra fa ultra da quai part dal dialog politic structurà e cuntinuà ch'il schef dal DFAE maina cun ils chantuns Grischun e Tessin. En il rom da quest barat è tranter auter er naschì il program «Piccolo Erasmus» che permetta al persunal da l'administraziun federala da lavurar en ina da las duas administraziuns chantunales e viceversa. Ellas ed els pon uschia prender ina invista persunala e professiunala da la diversitad da la Svizra.